

朔方道志卷之二十八

藝文志五 議說 書傳 銘贊 頌歌

議說

城古威州議

宋鄭文寶

威州在清遠軍西北八十里樂山之西唐大中時靈武朱叔明收長樂州邠寧張君緒收六關卽其地也故壘未圯水甘土沃有良木薪桔之利約葫蘆臨洮二河壓明沙蕭關兩戍東控五原北固峽口足以襟帶西涼咽喉靈武城之便然環州至伯魚伯魚抵青岡青岡距清遠皆兩舍而清遠當群山之口扼塞門之要芻車野宿行旅頓絕威州隔城東隅堅石盤亘不可浚池地中舊乏井脉又飛鳥泉去城尙千餘步一旦

緣邊警急賊引平夏勝兵三千據清遠之衝乘高守險數百人守環州
甜水谷獨家原傳箭野狸十族脇從山中熟戶黨項孰敢不從又分十
騎守磧北清遠軍之口既自環至靈七百里之地非國家所有豈威州
可禦哉請先建伯魚青岡清遠三城爲頓師歸重之地古人有言金城
湯池非粟不能守候二年間秦民息肩臣請建營田積粟實邊之策修
五原故城專三池鹽利以金帛啖黨項酋豪子弟使爲朝廷用不惟安
朔方制豎子至于經營安西綏復河湟此其漸也

屯田議

明張鍊

自古英賢之君奇智之士當諸侯割據華夏分爭之代以師行而糧從
餽運不繼相其臨戎廣野使戍卒耕稼其間耕而有獲以十一二輸官
以十八九自贍由來以爲良法美意者屯田是也趙充國以二羌反叛

廣田金城期年之間使先零坐斃曹操以征伐四方屯田許下墾荒積穀無遠運之勞諸葛亮與魏將嚴拒乃從容渭濱分兵屯田司馬懿畏而歛避鄧艾與吳爲隣開河渠溉田通於江淮大爲伐吳之資嗣是歷世因之其法寢備其利寢溥於今強敵陸梁非兵無以禦敵非糧無以養兵百計集兵千方足食而獨不及屯田者何也我太祖體國經野屯田遍天下而西北邊最多開屯之例軍以十分爲率以七分守城三分屯種墾田之令邊方閑田許軍民開種永不起科限畝輸租者爲額內之田不起科者爲額外之田然法久弊生弊久法盡瘠田荒蕪不治腴田爲豪強兼并爲官校侵奪爲巧慧移邱易畝汨沒于田混亂于籍征輸徒有其名芻粟不爲國用至于招商開中責令募兵墾田保伍屯聚視功力給牒予鹽酬值初時上下同利今復爲敝商蠱壞泥而不行然

經界在田中開列在紙上非高遠難行之事無幽隱不可究之理但求憂國敏事之臣專任責成待以不次之位其規畫措置一事聽其自爲直以期年爲限使田額如舊課程如舊無占種影射包賠如舊隨處有田隨處行師芻糧如峙內省帑運外省民輸有卒徒將領以足兵有溝洫隴畛以助險有樹藝園林以護耕轉盼之間變荒磧爲豐壤易流莠而樂康阜裕民足國未有善于此者昔唐德宗問李泌復府兵之策以兵多食少欲減京西戍兵泌請發左藏積繒因黨項易牛鑄農器糴麥種分賜緣邊軍鎮夏秋耕荒田而種之沃土久荒收入必多戍卒獲利則願耕者衆旣因田致富則不思歸及戍期將滿下令有願留者卽以所開田爲永業家人願來者本貫給食而遣之是後收入旣腆耕者願留家人願來變關中之疲敝爲富強泌之一言卽日行之如彼其速卽

年獲效如彼其厚矧在今日大修屯政簡付得人今年舉之則明年報功決食其利矣其他籌邊遠畧十百千萬無如此事爲急要也

鹽法議

張鍊

夫食鹽山澤自然之利天地所以養民也上古無征近古薄征以佐國用要在先不病民而後利國爲可貴耳關中食鹽一出於河東一出於花馬池一出於靈州一出於西漳靈州西漳去三輔絕遠專供靈夏洮岷西北兵民之用無容議矣花馬池鹽北供延慶平三府寧榆二鎮南與河東鹽並行於三輔間河東鹽上下公行謂之官鹽花馬池鹽私自貿易謂之私鹽民間便於私鹽而不便於官鹽者百年於茲矣必欲行河東官鹽其弊有四蓋行鹽郡縣各有分界所司徒知紙上陳跡河東鹽行三省不可越縮若究其實在山西河南未知何如其在關中自長

安以西河東美鹽絕跡不至間有至者皆泥滓苦惡中人不以入口唯耕夫寡婦黽勉食之計其所售無幾也名雖謂行其實未嘗行之一也往年商人慮惡鹽不售告發郡縣使所在輦運外加樣鹽包封印及之及以給民封者自佳輦者自惡唱戶分鹽畏如飲鴆計帳徵價峻於正稅今雖暫止旣爲故事恐不能已二也商人賣鹽與販夫隨以小票鹽盡票不收毀官鹽不至西路則無票無票則通責店肆負販細人請束路自買未毀之票繳官公人亦幸免責不問由來互相欺抵三也買票日久奸人依式私製盜賣僥倖者冒利敗露者破家雖有防禦迄今未已四也必欲禁花馬池私鹽其弊有五關中民貧衣食驅遣賦稅催切罄家所有走北地販鹽冀牟斗升之利一爲公人所獲身入陷阱家計盡空一也貧人旣爲囚繫內無供餽冬月多斃于獄考驛遞囚帳鹽徒

居半死者又居強半民命可恤二也小販懼捕結聚大夥經山谿要隘
偶遇公人勢強則抵敵勢弱則冒險奔逃投崖落澗人畜死傷塗地三
也公人與有力慣販者交關終歲不捕反爲導護惟單弱貧瘠者捕之
或以升斗惡鹽強入路人筐袋執以報公使無辜受害四也衆役工食
悉有定例惟巡捕工食私幫公費歲增十倍官吏比銷徒御勞悴動經
時月候文曠職旅食空囊或罰或貸俱爲無補五也夫物夫不齊物之
情也好美惡惡趨利就便民之情也所欲與聚所惡勿施哀多益寡因
俗成務司國計者之情也以物力言河東舊商帶支坐困新商起納無
幾澆陋徒勞增課未減公私俱稱歉矣河東一池雖差大供三省則不
足花馬二池雖差小供三郡二鎮則有餘自然之勢也以人情言河東
鹽百方督之使行至以泥沙勒售假票甘罪而終不能行花馬池鹽百

方禁之使不得行至於比屋破產接踵喪生而終不能禁者民之大欲大惡不可強也以國計言河東歲課一十九萬有奇花馬二池歲課不盈數千河東鹽一引三錢有奇二池鹽一石六分有奇如是相懸者意河東與天下六運自祖宗朝俱有定額由來久遠二池迫近塞垣棄取不時故課亦微渺後來因循取足原辦而止耳夫河東鹽旣不能及遠二池鹽卒不能禁民間又不可一日無鹽而盜買盜賣終非常理今當直開二池鹽禁使西鳳漢中沛然通行計三府所當常食河東鹽一十二萬有奇歲課即照河東責三府代辦以其事權統歸河東巡鹽御史則達觀無異督禁有程兩地歲徵四鎮年例保無纖爽而關中可少事矣夫居害者擇其寡與利者取其多倘今不弛二池鹽禁則愚民被逮供餽爲費罪贖爲費奸人騙詐爲費兵民歲增工食爲費官吏比銷爲

費一切顯隱猥雜不可會計財足抵河東花馬二池正課出于千瘡百痛徒然費之而下殘民命上損國體又餘殃也倘今一弛二池之禁則愚民被逮供餽可省罪贖可省奸人騙詐可省歲增工食可省官吏比銷可省一切顯隱猥雜不可會計財足抵河東花馬二池正課出于不識不知漠然省之而下活民命上全國體又餘福也夫人情不甚相遠比聞鹽法待御皆一時英碩表表長者使其聞見悉如關中人習知利病則亦何憚而不爲良處哉但其受命而來也惟以行官鹽禁私鹽爲職而反是則駭矣地非素履事未前聞雖聖人有所不知者何可遽望改易其常耶雖然安國家利百姓大夫出疆義也究理從長議政從便人心不昧因革有時此又關斯民之幸不幸也

定哨法議

總兵官撫民

奏爲遵旨不時再定哨法以肅責成事察照寧邊虜情哨法自噶劉變後因時停撤河西五路全倚賀蘭平虜洪玉南北相峙廣武中衛迤邐西麓關隘如貴德大風汝箕宿寇黃峽赤木等口舊有石砌關壘三道拒虜住牧山後威鎮長城西起賀蘭東趨河塹北面套衝南循河浹夏秋浮渡哨偵冰合距河防守河東橫城至花馬九城橫截套口虜逐水草耽視哨探出邊必抵水頭循環稽驗今河西之關壘盡毀于壬辰虜得憑山巢穴我反戍守山前自失險要依山五百里日間瞭望烽號旣資墩軍夜間伏空哨瓜必賴夜役崇禎三年議立標營撤回夜役自失嚴明今河東之邊牆風沙壅積濬溝扒沙全仗班軍今併停革延袤三百里之墩軍連年饑死殆盡凶荒固屬天災定哨實新功令伏望皇上嚴勅京民二運積欠勒限解發恩同賑恤招撫流移歸充墩哨仍復班

軍以供扒濬標營題入撫練合照舊設夜役名糧派發各營募補臣等
遵照先今題飭挨節哨探晝夜申飭召集熟諳邊外地里水頭撥夜通
事人等河西絲賀蘭等口出邊外赴五岔河等處偵探阿炸兒土壩等
曾有無結合莊肅海虜消息河東絲長城關出邊赴那各井可可腦兒
偵探山旦包六等曾有無到延鎮邊外神木灘與吉能會話但有東兵
勾調消息飛報會擣捧其內顧如此重大聲息當與延鎮寧鎮固鎮共
一耳目挨節哨報及于本邊各水頭偵探得實俱照欽定格例陞賞有
差如哨報不實遲悞軍機梟斬責罰有差原頒書冊昭布中外不敢細
列臣謹會撫臣李虞夔謹將遵行原絲具奏伏望聖明裁奪施行

預籌邊防議

官撫民

竊照寧疆邊務最急在錢糧缺乏饑荒莫救河東邊牆三百餘里橫截

套口黃沙灘磧千里蕭條曠旱頻年無青草死者填委山溝生者扶創
匍匐河西僅藉渠流粒食四方爭販就食蜂攢嗷嗷洵同歸於盡然
猶未敢以賑濟乞恩卹者誠念歲額二運積欠百萬軍民望眼流血遑
及溝壑之餘貽我聖明西顧之憂哉崇正十二年八月內先該餉臣宋
聯奎題陳壓欠二運之數與今歲接濟無術之狀奉聖旨該鎮二運錢
糧積欠如許殊堪痛惻今歲年例銀卽著該部措發數萬速解接濟賞
恤銀也應酌給以鼓士氣民運疾呼不應地方官尤屬頑玩該撫按何
未見指參姑酌嚴行司府等官將各項額欠務期歲前補解再延并撫
按重處該部馳飭行欽此欽遵渙傳兩河頓顙感泣忍死須臾以待距
今又復經年民運交困日甚一日况今屢蒙部檄選練飭秣以聽不時
飛調臣頂踵自誓捐糜簡銳綦嚴罔敢不預其如錢糧缺乏掣肘難行

疑難實病攸繫安危竊思二十年之積欠數幾百萬而欲遽補於一朝徒煩督責逾致淹延伏乞皇上前鑒聖衷痛惻之嚴旨今懸四千里窮迫之疾呼立賜宸斷將二運積欠三分之一欽定各發若干萬兩懇請馬上專官飛飭坐守勒限急解毋容貽悞封疆併祈天語勅部特將本年歲額軍餉馬價隨同練餉按季給發題差領解急濟難危臣與撫臣同勵薪膽共此擔承雖經前疏控陳猶懼微誠未格是以復申前懇亟得藉手力行圖維克備整飭聽調而於得心應手著數皆從錢糧湊集處畢其智慮而握多算矣

承天寺塔倒影說

杭 秦

承天寺寧郡古刹也有浮圖焉高十三級峙乎城市塵囂中非曠渺奇絕之觀也每六月六日遊者雜遝競傳異景何異乎異不在形而在影

形正而影倒也噫斯誠可異矣問其所以大抵影響傳會者衆無足稽考志乘所載庶幾彷彿近之而又有不可盡信者南澗楊公之說也謂以下凹處映其上則影必倒而証以鏡面凹者照人則首倒垂之驗夏人士遂遵其說用祛衆疑顧此塔所臨者通衢坦道未聞有廣澤深溪映帶左右影胡爲乎倒或曰此塔貯有佛骨舍利洎諸寶物精英萃乎內而峙形年久上涵清虛已成其象然旣已成其象必能自衛其形乃一遇震災卒傾頽毀敗形影俱滅竟成瓦礫嗟乎向之佛骨舍利洎諸寶物其精英之所萃聚尙不足自固也且傳其影初在寺之南廊後轉東廊是又將何以解之耶蓋聞古塔之影皆倒垂塔之倒影不多見倒影之塔不僅此昌黎所謂浮圖善幻殆其類與夫形端影正其說不可少易聖賢之所以教學者之所以學上之人率其下下之人應其上達

則植標于世窮則樹表于家其理皎如日月其機捷于形影夫婦之愚可以與知焉若形正影倒變幻叵測斯謂之浮圖而已矣存而不論可也

書傳

答趙元昊書

宋范仲淹

仲淹謹修誠意奉書於夏國大王伏以先大王歸嚮朝廷心如金石我真宗皇帝命爲同姓待以骨肉之親封爲夏王雖未嘗高會嚮者同事朝廷於天子則父母也於大王則兄弟也豈有孝於父母而欲害於兄弟哉不可不爲大王一一陳之傳曰名不正則言不順言不順則事不成大王世西土衣冠語言皆從本國之俗何獨名稱與中朝天子侔擬名豈正而言豈順乎如衆情莫奪亦有漢唐故事單于可汗皆本國極

尊之稱具在方冊仲淹料大王必以契丹爲比故自謂可行且契丹自石晉朝有援立之功時已稱帝今大王世受天子建國封王之恩諸番中有叛朝廷者大王當爲霸王率諸侯以伐之則世世有功於王不絕乃欲擬契丹之稱究其體勢昭然不同徒使瘡痍病民拒朝廷之禮傷天地之心易曰大地之大德曰生聖人之大寶曰位何以守位曰仁是以天地養萬物故其道不窮聖人養萬民故其位不傾又傳曰國家以仁獲之以仁守之者百世昔在唐末天下恟恟羣雄咆哮日尋干戈血我生靈腥我天地滅我禮樂絕我稼穡皇天震怒罰其不仁五代王侯覆亡相續老氏曰樂殺人者不可得志於天下誠不誣矣後唐顯宗祈於上天曰願早生聖人以救天下是年我太祖皇帝應期而生及歷試諸艱中外忻戴不血一刀受禪於周廣南江南荆湖四川有長江萬里